

**Valhefti
í 7. og 8. bekk
veturinn
2009-2010**



Nú fá nemendur sem verða í 7.-10. bekk næsta vetur í hendurnar valbækling sem við biðjum þá og foreldra þeirra að kynna sér vel. Markmið okkar er að auka áherslu á val á þessu aldurstigi og gefa nemendum þar með kost á að dýpka skilning sinn á ákveðnum viðfangsefnum um leið og þeir geta sleppt öðrum. Öllu vali fylgir ábyrgð og með því að auka valið eykst ábyrgð nemenda á því námi sem þeir kjósa að taka sér fyrir hendur. Við leggjum líka áherslu á að valið aukist eftir því sem nemendur eldast í samræmi við þroska þeirra og getu.

Nemendur þurfa að hafa skilað inn valblaði í síðasta lagi 20. maí. Ef einhverjar spurningar vakna varðandi valið þá vinsamlegast hafið samband við Eygló eða Þórgunni.

Smiðja í 7. og 8. bekk

Næsta vetur verða 7. og 8. bekkingar í sex svokölluðum smiðjutímum á viku. Hver smiðja stendur í 8 – 9 vikur og komast nemendur því í fjórar smiðjur yfir veturinn. Í boði verða heimilisfræði, leiklist, myndmennt, smíðar, textíl og tölvur. Hér á eftir kemur nánari lýsing á því sem er í boði í hverri smiðju og biðjum við nemendur að velja þær fjórar smiðjur sem þeir vilja helst fara í. Einnig biðjum við þá að merkja við aðra smiðjuna sem eftir verður þ.e. hvora þeirra þeir vildu heldur fara í því hugsanlega getur svo farið að einhverjir fái ekki allar smiðjurnar sem þeir óskuðu helst eftir.

Heimilisfræði

Fjölbreytni verður í fyrirrúmi hjá okkur í vetur. Við heimsækjum hornfirsk matvælafyrirtæki, kynnumst því sem þau bjóða upp á og nýtum okkur hráefni og hugmyndir frá þeim í eldhúsinu. Við fjöllum um heilsueflingu og heimilislegan mat og nemendur fá að leyfa sköpunargleðinni að njóta sín í að elda einfaldan mat þar sem hollusta og fjölbreytni er í fyrirrúmi. Við bökkum brauð og girnilegar kökur. Einnig fá nemendur tækifæri til að koma með uppáhaldsuppskrift að heiman.



Leiklist



Leiklistin kennir okkur að setja okkur í spor annarra. Þannig verðum við færari í að skilja og umgangast aðra. Við vinnum með einbeitingaræfingar, leiki sem tengjast leiklist og spuna og nemendur eru þjálfaðir í að spinna út frá fyrirfram gefnum aðstæðum. Við vinnum með persónusköpun, texta, framsögn og raddbeitingu. Við kynnumst ólíkum leikhúsformum og kíkjum á sögu leiklistarinnar í gegnum aldirnar.

Myndlist

Í myndlist er unnið á fjölbreyttan hátt og grunnþættir myndlistar, formfræði, litafræði og myndbygging, hafðir í huga við myndsköpunina. Nemendur vinna fjarvídarmyndir og uppstillingar. Einnig er unnið nokkuð með mannlíkamann, t.d. í teiknun og málun og einnig með gifsi eða pappamassa. Grafík verður hluti af því sem gert er og er þar unnin dúkrista (skorið í vínyldúk og prentað) og nemendur læra um fjölfeldi og þrykk.



Nemendur safna verkum sínum í möppu og fara með heim að skólaárinu loknu.

Smíðar




Í 7. og 8. bekk verður unnið með gler líkt og gert hefur verið í 7. bekk undanfarin ár. Nemendur stíga sín fyrstu skref í glerskurði, smíða brjóstnælu, kertastjaka og e.t.v. eitthvað fleira. Þar sem 8. bekkingar þekkja glervinnuna gera þeir flóknari verkefni.

Ef tími vinnst til verður smíðuð rafmagnsgestapraut sem er einskonar mælir fyrir handskjálfta.

Textílmennt - fatasaumur


Í þessu vali er saumuð flík. Nemandi tekur mál af eigin líkama og skoðar stærðartöflur í saumablöðum. Hann tekur upp snið í réttri stærð og sníður úr viðeigandi efni. Nemandinn er hvattur til að setja persónulegan svip á verkefnið. Nemandinn er hvattur til sjálfstæðra og agaðra vinnubragða.



Tölvur til gagns og gamans

Farið verður í almenna tölvuvinnslu og helstu möguleikar Office-pakkans

kynntir. Einnig verður unnið í Prodesktop sem gefur nemendum tækifæri til að teikna og útfæra hugmyndir sínar í því íforritinu tölvutæku formi á einfaldan hátt. Myndvinnsla verður hluti af námsefninu og verður unnið í forritum sem nálgast má ókeypis á netinu. Einnig verður farið í einfalda hljóðvinnslu, tölvupóstsamskipti, heimasíðugerð og fleira. Lögð verður áhersla á að kynna forrit sem nálgast má á netinu og allir geta haft gagn og gaman af.



Val í 7. og 8. bekk

Tveir tímar í viku verða ætlaðir í val næsta vetur þar sem nemendur í 7. – 10. bekk munu blandast saman. Valtímabilin verða fjögur, tvö fyrir áramót og tvö eftir áramót. Sumt val er þess eðlis að það nær yfir tvö tímabil eða jafnvel fjögur.

1. Tónlist

Í þessum valáfanga ræður tónlistin ríkjum, eins og nafni ber með sér. Áhersla verður lögð á að kynna ákveðna listamenn bæði í tali og tónum. Horft verður á tónleikaupptökur ásamt fleira efni sem til fellur og lögð áhersla á að kynna tónlist síðustu áratuga, jafnt innlenda sem erlenda. Nemendur vinna verkefni sem tengjast viðkomandi tónlistarmönnum og tónlistarstefnum.

2. Myndmennt – gifs

Hér ætlum við að vinna með gifs. Við útbúum fólk eða dýr úr pappír, vír, límbandi og fleiru slíku og notum svo gifsbindi til að gera stytta úr því sem við höfum mótað. Þar á eftir málum við og skreytum styttuna okkar og gerum hana fína og flotta.



3. Myndmennt - glermálun


Í þessu vali ætlum við að prófa ýmsar tegundir af glermálun. Við málum á flöskur, glerkrukkur, smelluramma og fleira. Hugmyndaflugið er það sem skiptir máli.

4. Legókeppnin

Fyrsta valtímabilið í Legói er fyrst og fremst fyrir 7. bekkina þar sem þeir fá tækifæri til að undirbúa sig fyrir Legókeppnina. Sú hefð hefur myndast að 7. bekkur tekur þátt í Legókeppninni og við ætlum að halda þeirri hefð í vetur. Þeir sem velja Legó á þessari önn verða þó að vera reiðubúnir að leggja töluvert meiri vinnu á sig en einungis þessa tvo valtíma á viku því undirbúningur fyrir Legókeppnina er töluvert meiri. Einnig verða þeir að vera reiðubúnir að sleppa stöku íþróttatíma eða öðru sem gæti rekist á undirbúning fyrir keppnina og hugsanlega leggja á sig heldur meira heimanám ef þeir verða að sleppa úr tímum í skólanum vegna undirbúnings.

5. Legó

Tæki og tól verða smíðuð úr legókubbum og virkni þeirra könnuð. Sum tækin verða knúin með rafmótor en önnur með handafli. Þrautir verða lagðar fyrir nemendur og þeir finna lausn með hjálp kubbanna. Nokkur eðlisfræðilögmál verða könnuð og hugmyndaflugið fær að njóta sín.




6. Nýsköpun

Valnámskeið þar sem nemendur þróa nýsköpunarhugmynd sína yfir í veruleikann. Þeir stofna lítið fyrirtæki og breyta hugmynd sinni (vöru eða þjónustu) í söluvöru. Þeir gera líkön og frumgerðir eftir því sem við á. Nemendur gera markaðskönnun og viðskiptaáætlun o.s.frv..

7. Kvikmyndagerð

Í þessu vali ætlum við að gera myndband sem sent verður í myndbandasamkeppni 66°N. Viðfangsefnið er frjálst, má vera stuttmynd, tónlistarmyndband eða annað sem nemendum dettur í hug. Þetta val verður ekki einungis unnið í val tímunum heldur einnig utan þeirra því skila þarf myndbandinu inn fyrir lok september.



8. Skák

Lögð er áhersla á að nemendur hafi gaman og gagn af skákinni. Einnig verður leitað til ýmissa aðila um að koma og tefla fjöltefli við þátttakendur. Til greina kemur að þeir sem skara framúr fái að taka þátt í mótum á vegum Skáksambands Íslands. Helstu markmið eru að þátttakendur læri mannganginn, fái æfingu í að tefla og leysi ýmsar þrautir í skák.

9. Heimavinna

Vantar þig aðstoð við heimanám? Langar þig að spjalla um heima og geima? Viltu reyna þig í stærðfræðispilum eða þrautum? Við mælum með því að þeir sem vilja fá ró og næði komi í þennan hóp. Þar verður nóg að gera en allt í rólegri kantinum.



10. Upplestur – ræðumennska - fundarsköp

Í þessu vali ætlum við fyrst og fremst að æfa okkur í ræðumennsku, upplestri og fundarsköpum. Við æfum okkur í að semja ræður og flytja, koma í pontu og standa fyrir máli okkar, hlusta á aðra og ná aðalatriðum í málflutningi þeirra til að geta svarað og fleira.

11. Útivist

Útivistin verður í samstarfi við björgunarsveitina og ferðafélagið og er kennd í tórnum. T.d. farið upp í Lónsöræfi eina helgi að hausti og farið einn laugardag í ísklifur með björgunarsveitinni yfir veturinn. Við lærum á GPS og að lesa úr kortum og einnig að hnýta nokkra hnúta. Við förum í stuttar gönguferðir yfir veturinn og einnig í klettaklifur og sig. Kannski endum við svo veturinn með því að ganga á Skálatindana!



12. Boltaval

Í þessu vali ætlum við að taka fyrir allar boltagreinar: Blak, fótbolta, handbolta og körfubolta. Nú tökum við á því!



13. Förðun og tíska

Nemendur þurfa ekki að hafa neina þekkingu í greininni, heldur áhuga á förðun og tísku því að byrjað verður alveg frá grunni. Í förðun verður farið í gegnum meðhöndlun á vörum og áhöldum og umhirðu á húðinni. Farið verður í grunnatriði í sambandi við förðun og mismunandi aðferðir sem hægt er að nota. Fjallað verður um hvernig tíska og förðun fléttast saman, þróun frá mismunandi tímabilum og til dagsins í dag. Skoðaðar verða bækur um tímabilaförðun, tískutímarit og sýningar. Nemendur vinna tveir og tveir saman, og gera vinnubók með mismunandi verkefnum.



14. Badminton

Við ætlum að æfa okkur í badminton og fara þar í ýmsar æfingar sem við komust aldrei yfir í venjulegum íþróttatímum.



15. Ljósmyndun

Í ljósmyndasmiðjunni ætlum við að læra ýmislegt tengt ljósmyndun. Við ætlum að læra á helstu stillingar á myndavélinni eins og ljósop, hraða, whitebalance og ISO, læra að taka góðar myndir án þess að þurfa að breyta þeim mikið í ljósmyndaforritum, finna myndaefni og hvernig við vinnum úr því, hvað þarf að hafa í huga þegar myndir eru teknar bæði úti og inni, við ætlum að gera heimasíðu á flickr.com þar sem við setjum inn myndir frá okkur, halda ljósmyndasamkeppni og fleira og fleira...



16. Matreiðsla

Í matreiðslu í val tímum í vetur ætlum við að taka fyrir ákveðin þemu. Í fyrsta þema verður það *Létt og ljúffengt* en þá matreiðum við t.d. amerískar pönnukökur og ítalskt brauð. Í öðru þema höfum við *Alþjóðlegt yfirbragð* og eldum t.d. Taco kjötbrauð og franska súkkulaðiköku.

17. Útivera

Í útiveru ætlum við að vera úti og gera allt það sem okkur dettur í hug. Hugmyndir nemenda um hvað hægt er að gera í útiveru verða vissulega teknar til greina. Við munum vera innanbæjar í langflestum tilfellum og nýta okkur það sem við höfum. Farið verður í hjólaferðir, á skauta, línuskauta, í alls konar leiki, og búnir til ratleikir. Við förum í göngur um bæinn með mismunandi markmið í huga, t.d. í fuglaskoðun með leiðsögumanni, í Hrossabitahaga, Óslandið, í Boot Camp, notum útistöðina hjá Júllatúninu, förum í kubb, gætum tekið upp kvikmynd/ljósmyndir og margt fleira. Við lærum að elda úti í náttúrunni og klæða okkur eftir veðri og reynum að finna okkur eitthvað skemmtilegt að gera úti, sama hvernig veðrið er! Við munum vera dugleg að taka myndir og halda úti heimasíðu um útiverustarfið.



Valblað

Nafn: _____ Bekkur: _____

Smiðja

Nú átt þú að velja þér þær fjórar smiðjur sem þú helst vilt fara í með því að merkja frá einum og upp í fjóra. Þú þarft einnig að velja á milli þeirra tveggja smiðja sem eftir standa og merktu 5 við þá sem þú vilt frekar því hugsanlega getur svo farið að einhverjir fái ekki allar smiðjurnar sem þeir óskuðu eftir.

Merktu frá 1 – 5.

Heimilisfræði	()	Leiklist	()
Myndmennt	()	Smíðar	()
Textíl	()	Tölvur	()

Valhópur

Nú átt þú að velja þér valhópa fyrir næsta vetur. Þú átt að velja fyrir tvö tímabil (fyrir áramót) þannig að þú þarft að velja 1 tvisvar sinnum, 2 tvisvar sinnum og 3 tvisvar sinnum. Við reynum að koma sem flestum í 1. val en ef það tekst ekki þá notum við 2. eða 3. val.

- | | | | |
|--|-----|---------------------|-----|
| 1. Tónlist | () | 11. Útivist | () |
| 2. Myndmennt – gifs | () | 12. Boltaval | () |
| 3. Myndmennt – glermálun | () | 13. Förðun og tíska | () |
| 4. Legó keppnin | () | 14. Badminton | () |
| 5. Legó | () | 15. Ljósmyndun | () |
| 6. Nýsköpun | () | 16. Matreiðsla | () |
| 7. Kvikmyndagerð | () | 17. Útivera | () |
| 8. Skák | () | | |
| 9. Heimavinna | () | | |
| 10. Upplestur – ræðumennska-fundarsköp | () | | |

Vinsamlegast skilið valblaðinu fyrir 20. maí 2009.

